


人鏡陽秋卷六

明新都無無居士汪廷訥昌朝父編

孝部

不匱類

無無居士曰百行孝先不匱為大蓋孝者子
之心亦天下萬世子之心吾能孝於親是可
以則誰不感發而各親其親乎斯人之孝即
吾之孝此心融洩於天壤間安得云匱故曰
庶山萬古淚化作幾曾參知言哉




虞舜

舜虞帝名姚姓舜祖幕幕生窮蟬窮蟬生敬康
敬康生喬牛喬牛生瞽叟瞽叟生舜受堯禪而
有天下初居姚墟父頑母嚚象傲耕于廙山見
鳥翔思親而作操曰陟彼廙山兮崔嵬有鳥翔
兮高飛瞻彼鳩兮徘徊河水洋洋兮清冷深谷
鳥鳴兮鶯鶯設罾張罝兮思我父母力耕日與
月兮往如馳父母遠兮吾將安歸歌罷號天而
泣祇載見瞽叟夔夔齋慄瞽叟底豫而天下化

故玄德升聞二女墜降萬世稱大孝焉



無無居士曰舜德升聞以孝著也舜孝之至
尊養極也然皆忘焉耳矣使親心底豫雖側
陋樂之况天下乎苟親心未化即黃屋猶廙
山也煙雨之淚烏乎能已要之至誠自無不
感尊養之至即至誠也非後來有加故曰五
十之慕等怨慕也舜何心哉斯之謂大孝



殷高宗

殷高宗諒陰三年不言百官總已而聽於冢室
三年而後言天下咸悅教化大行殷道以興詩
曰一人有慶兆民賴之其此之謂乎

無無居士曰高宗可謂以孝治矣不言孝也
而至言已寓厥後股肱得人嘉靖殷邦者皆
不言之用也想其恭默之際思與帝通而代
言者應焉且謂行之惟艱言亦顧矣允協先
王成德殆孝立於言行之間者與





周文王

文王之為世子朝於王季日三鷄初鳴而衣服
至於寢門外問內豎之御者曰今日安否何如
內豎曰安文王乃喜及日中又至亦如之及莫
又至亦如之其有不安節則內豎以告文王文
王色憂行不能正履王季復膳然後亦復初食
上必在視寒煖之節食下問所膳命膳宰曰末
有原應曰諾然後退文王孝道光其化自近
至遠刑于寡妻以御于家邦故得萬國

以事其先王矣

無無居士曰世以問安視膳為踈節不知此
中有實心相流通者曰喜曰憂從何生哉實
心生也惟其一寢食不忘親故憂喜露于斯
爾疇謂文王為無憂哉有憂所以成其無憂
也無憂而喜可知矣其與世之徒問徒視者
誠不侔



魯孝公

魯孝公之為公子周宣王問公子能道訓諸侯者立之樊穆仲稱其孝曰肅恭神明而敬事耆老賦事行刑必問于遺訓咨于故寔不干所問不犯所咨王曰然則能訓理其民矣乃命之於夷宮是為孝公夫宗廟致敬不忘親也有國不亦宜乎


無無居士曰魯之先尊尊而親親本以忠厚立國者也耆老者國之神明問且咨之其為敬事者依然尊親之典矣神民之道一也能恭即能理矣比其衰也少長之間尚斷斷豈大亂之本生於斯耶不然哉





曾子

曾子養曾皙每食必有酒肉將徹必請所與問有餘必曰有常採薪於山中家有親客至母無所措乃噬指參忽心痛負薪以歸跪問其故母曰有急客至吾噬指以悟汝耳及親沒曾子曰往而不可還者親也至而不可加者年也是故孝子欲養而親不待也木欲直而時不待也是故椎牛而祭墓不如鷄豚逮親存也故吾嘗仕齊為吏祿不過鍾釜尚猶欣欣而喜者非以為多也樂其逮親也既沒之後吾嘗南遊於楚待尊官焉堂高九仞椽題三圍轉轂百乘猶北鄉而泣涕者非為賤也悲不逮吾親也故家貧親老不擇官而仕若夫信其志約其親者非孝也無無居士曰子輿之孝孟軻氏可其養志然點之志詎在飲食間求之母亦即飲食而俾其曠蕩無涯者弗之隘爾與人同春浴沂風雩本自有餘疇禁勿取有餘之問自是同人之懷也此而曰有其所供者大矣嗟夫南遊

炫赫北鄉悲號志寧有已時耶故知子輿之
養一夫子之與也





4



高柴

高柴字子羔一作季子臯衛人也喪親泣血三年未嘗見齒所謂哭不偯言不文也為武城宰而化行民有不服其親者改之行喪如禮君子之德風也以身先之而民不遺其親


無無居士曰子羔在聖門以愚鳴則其孝行愚而孝也蓋愚則質質有其文哉其哭而不偯有故夫至於化行之道則速矣余讀成人之歌而艷子羔之衰溥也故曰柴之愚即參之魯二子之孝竟以是得之



閔損

閔損字子騫魯人早喪母父娶後妻生二子損
孝心不怠母嫉之所生衣綿絮衣損以蘆花絮
父冬月令損御車體寒不覺失鞞父責之損不
自理父察知之欲遣後母損啟父曰母在一子
寒母去三子單父善之母亦悔改待三子均一
遂成慈母

無無居士曰子騫以孝見稱於夫子傳溢外
內豈直處繼母乃爾良由孝心不怠尅己以
自盡也觀其體寒失鞞而含酸茹苦之情可
掬矣至母在一子寒母去三子單可謂字字
酸心言言苦骨抵令讀之令人三復為之流
涕



河間惠王

漢河間惠王獻王之曾孫也西京藩臣多驕放之失其明德者唯獻王而惠王繼之漢書稱其能脩獻王之行母薨服喪盡禮哀帝下詔書褒揚以為宗室儀表增封萬戶禮古之人皆然至於末俗衰薄固已賢矣貴而率禮又難其見褒賞不亦宜乎

無無居士曰德為禮本未有德不明而禮能盡者也惠王脩父之行而自昭明德藩王之

